

**Monday, January 19, 2026**

**Time - 2:30pm - 2:35pm**

**AKASHVANI AIZAWL**

**REGIONAL NEWS UNIT**

**CM**

Chief Minister Pu Lalduhoma chuan vawiin chhun khan Sesawng ram chhung Tuirini kamah kawlpheha megawatt 24 siam chhuak thei tura duan Tuirini Small Hydel Project (SHP) siamna tur lungphum a phum a; Project atan hian New Development Bank (NDB) atangin loan cheng vbc 676 point 98 puk a ni ang.

Tuirini SHP Survey & Investigation (S&I) hi Central Water Commission (CWC) chuan NEC Programme atangin bul an tan a, kum 2007 March thla khan Detailed Project Report an peih a. Kum 2016 khan Mizoram sorkar chuan DPR ennawn turin M/s WAPCOS a ruai a, Externally Aided Project (EAP) hnuai thawh turin Ministry of Finance hnuai Department of Economic Affairs (DEA)-ah dilna thehluh a ni.

DEA hian EAP-a thawh turin a pawm a, loan lakna turin New Development Bank (NDB), Shanghai chu thlan niin, NDB hian project inbuatsaih nan US dollar 3,00,000 a sanction a, hetih lai hian Mizoramah sorkarna inthlak avangin Tuirini SHP thawh tura inbuatsaih mek chu tihtawp niin, NDB-in project support a sanction tawh pawh a dawng duh ta lo a ni.

Sawrkhar chuan project atana senso turte ennawnin DEA-ah Externally Aided Project turin September ni 17, 2024 khan dilna Preliminary Project Report a thehluh a, Tuirini Project chu DEA screening Committee chuan kum 2025 February ni 28 khan Externally Aided Project a thawh turin a pawm leh ta a ni.

DEA hian loan hi NDB atanga lak turin a ruahman leh a, Power & Electricity Department leh NDB hotute hian loan chungchangah inremna ziaak turin hna tulte an thawk mek a; NDB Mission Team hian kum 2025 khan Mizoram rawn tlawhin, Tuirini SHP chungchang te leh Mizoram sorkar dinhmunte an rawn zirchiang a, an report hi NDB Board of Director pawmpui turin ruahman mek a ni.

New Development Bank duh danin Mizoram sorkar chuan Tuirini SHP enkawltu tur bik Project Monitoring Unit a din fel tawh a; Project Management Consultant rawihna tur tender pawh nikum December thla khan tihchhuah a ni.

Tuirini Project hi kawlpheha megawatt 24 pe chhuak thei tura ruahman a ni a, kum khatah kawlpheha unit maktaduai 64.1 a siam chhuak thei dawn a ni.



**ADVISER TO CM**

Adviser to Chief Minister Pu TBC Lalvenchhunga'n Lengpui Ram IAF hnena Hralhna cheng vaibelchhe 187.90 dawn chu sorkar hmasa huna tihfel vek tawh a ni a ti a, an sawrkhar hnuah zangnadawmna pawisa sawrkhar laipui atanga lokal chu an pe chhuak tih a sawi.

Wawiina ZPM chhung inkhawmah he thu hi sawiin Pu TBC Lalvenchhunga chuan Vanglaini chanchinbua senior journalist Pu HC Vanlalruata thu ziah, 'Lengpui Ram IAF Hnena Hralh' a lo lang zangnadawmna cheng vaibelchhe 187.90 dawn chungchang chu sorkar hmasa huna tihfel vek a ni a ti a, zangnadawmna pawisa chu sawrkhar laipui atanga lokal an sawrkhar hnuah pekchhuah ani a ti a, IAF ram lei leh hralh chu Lengpui ram chauh ni lovin Sihphir ram acre 5 a tel tih a sawi bawk.

Pu TBC Lalvenchhunga chuan sorkar hnen thleng loa ram hralh theihna DC 'level'-a a zo vek thei chu mak a tih thu a sawi a, IAF ram lei chu DC 'level'-ah a tawp vek tih sawiin cheng vaibelchhe 187.90 in hralh ani a ti bawk.



## HANDHOLDING SCHEME

Mizoram sorkarin hmasawna leh intodelh tum te puihna atana a duan Bana Kaih (Handholding) Scheme thawh hnihna (Phase-II) hnuaiyah loan component progress partner atana dilna 386 pawm a ni tawh a; Phase-I hnuaiyah progress partner atana thlan mi 349 hnenah bank-ten loan an pe tawh.

Bana Kaih Scheme hnuaiyah loan dilna lut hi a kaihnawih sorkar department (implementing department)-te'n an endik hnuah implementing department-te'n recommend list an thehluh atang, a felfai leh pek tlak ho chu Handholding scheme-a thuneitu sang ber Apex Body-in ngaihtuahin a pawmpui thin a; Apex Body-in a pawmte hi bank-te hnenah an pawmpui tura thehluh leh thin niin, bank-te hian dilna an pawmte hnenah loan an pe chhuak thin a ni.

Mizoram State Policy Coordination Committee (MSPCC) hotute hnen atanga Akashvani News Aizawl thudawn danin, Bana Kaih Scheme thawh 2-na kalpui mekah hian loan component hnuaiyah progress partner ni tura dilna lut zinga 386 pawm a ni tawh a; Phase-II loan component-ah hian Bana Kaih hnuaiyah sorkarin a thawhpui bank-ten mi 7 hnenah loan an pe tawh a ni.

Bana Kaih Scheme Phase-II loan component hnuaiyah loan pek tura dilna pawm tawhte hi Commerce & Industries department hnuaiyah 219 niin a tam ber a; AH&Vety department hnuaiyah dilna pawm tawh 81-in a dawt a ni. Mizoram KVI Board hnuaiyah dilna 35, Cooperation department hnuaiyah 20, Land Resources Soil & Water Conservation department hnuaiyah 10, Agriculture & Farmers Welfare department hnuaiyah 6, Fisheries department hnuaiyah 5, Horticulture department hnuaiyah 3, UD&PA leh Tourism department hnuaiyah 2 ve ve, Sports & Youth Services department, Information & Communication Technology department leh Science & Technology hnuaiyah dilna 1 theuh pawm a ni tawh bawk.

Handholding Scheme Phase-I hnuaiyah loan component-ah khan Bana Kaih hnuaiyah sorkarin a thawhpui bank 3-ten mi 349 hnenah loan an pe tawh a; Mizoram Rural Bank-in loan pe tam tawh berin mi 232 hnenah an pe tawh a, State Bank of India-in mi 78 leh Mizoram Cooperative Apex Bank-in mi 39 hnenah an pe tawh bawk a ni.

Mizoram State Policy Coordination Committee-in a tihchhuah 'Progress Partner-te Puitu' tih lehkhawia tarlan danin, progress partner-in loan a lakna atana project a siam chu cheng nuai 50 aia tam lo a nih a, bahlah loa thla tin a rulh bawk chuan Mizoram sorkarin an bana kaih nan an loan pung (interest) zawng zawng chu kum chanve (thla 6) danah an mimal bank account pangngaiah a rul let thin dawn a; hemi tur hian progress partner-te chuan loan an lak chu bank kalphung angin a pung zawng zawng nen an rulh phawt a ngai thung a ni.

Bana Kaih Phase-I hnuaiyah loan cheng nuai 50 la tlinglo zingah bank-ten loan an pek atanga thla 6 liam tawh engemawzat an awm a, heng mite zinga loan rul thate hnenah hian sorkar chuan an loan rul atanga pung an pek tel chu rul let turin buaipui ngaite a buaipui mek niin Mizoram State Policy Coordination Committee hotute chuan an sawi a ni.

